

La meztga da chasa

La famiglia Pfister da Schlans è l'unica famiglia en Surselva che fa anc meztga da chasa a la veglia. La redactura dad RTR *Bertilla Giossi* ha documentà quest atun quella meztga per in film dals Cuntrasts che vegn emess quests dis. Ina foto-galleria or dal film.

Ils sis fragliuns Pfister mainan enavant quai ch'els avevan vis ed emprendi da lur geniturs. Antruras mazzava lur bab ils agens portgs e quels dals vischins. Uss fa Silvio Pfister, il frar giuven, quella lavur. Sper sia tratga da chavals ha el era anc trais portgs. Mintg'onn, la fin da november, vegnan dus dad quels mazzads.

Per quest di da meztga sa radunan tut ils sis fragliuns. Las lavurs èn repartidas tenor preferenza e savair. Silvio, sper pur er anc mazler da professiun, mazza il portg. Ils dus frars e la sora giuvna gidan, entant che tshellas duas soras preparan il gentar e la tschaina per tuts, per grond e pitschen. Ils portgs da Silvio Pfister èn dal raz portg nair da las Alps. Quel raz è vegni reintroduci ils davos onns. Tar Silvio Pfister na vegn il portg betg chatschà al lieu da meztga, mabain carmalà natiers. Ins n'auda betg in soli sbratg u sgrign da l'animal. Tuts spetgan enfin che l'animal vegn ord libra voluntad en il lieu da ses destin final. Sin questa pagina è da vesair ina collecziun da fotografias or dal film da Cuntrasts dad RTR.



Silvio Pfister spetga en fin ch'il portg vegn voluntarain en il lieu da ses destin. En il mument dal sajot mortal maglia il portg anc en tutta ruassaivladad. (raz dal portg: portg nair da las Alps)

FOTOS: CUNTRASTS/RTR



Il portg è mazzà e stgnà. Avant che cuntinuar cun las lavurs di Silvio Pfister «engrazia» al portg.



Suenter ch'il portg è sbugliantà cun aua chauda vegnan sgaradas davent las zaidlas. Quai sto ir spert. Tut ils frars Pfister (Beat, Toni e Silvio) gidan.



Èn las zaidlas grossas davent, lura vegnan las finas sgriffadas davent cun cuntels gizz, enfin che la pel da portg glischa.



L'emprim vegn taglià davent il chau. La charn dal chau vegn en las liongias. La lieunga ensalada vegn suenter cuschinada en la schuppa.



La beglia ed ils organs èn davent, ussa vegn il portg taglià en duas parts cun ina resgia, ina strentga lavur.



Ils schambuns vegnan l'emprim en tschaler. La saira vegnan els mess en salamaira. Là restan els enfin in mais, per lura vegnir setgentads.



La tschaina dal di da meztga è in past festiv per tut ils gidanters e las gidantras, per grond e pitschen. I dat fratem dal portg mazzà.

Per mazzar ses agens portgs na dovra Silvio Pfister nagina lubientscha, el sto dentant sa tegnair vid duas premissas. Ina giada sto el suandar la lescha che protegia l'animal. La lescha pretenda ina savida cumpetenta da la persuna che mazza e che l'animal vegnia mazzà senza ch'el haja da patir. La segunda premissa per la meztga da chasa: La charn na dastga betg vegnir vendida, ella è mo per l'agen diever. (rtr/fmr)

Il film cun il tital "Metzga da chasa a Schlans" è da vesair gia ussa online sin www.rtr.ch ubain questa dumengia en televisiun, a las 17.25 sin SRF1.